


Musico Alfonso Gibbs a muri na Merca

Alfonso Gibbs, conoci pa hopi na Aruba como **Fong of Fonso**, tambe como **Ben**, a muri na Merca dialuna.

Fonso tabata conoci na Aruba

tempo di su hubentud como deportista, principalmente como hungador di tennis y ademas tabata tin musica como un hobby ferviente.

Despues di a termina scol na Aruba, -- Augustinus College y La Salle-- el a bay Merca pa estudio mas leu y a keda biba eyan tambe.



El a gradua como maestro di scol na Merca y pa 29 aña a duna les na Junior High School 33 na New York.


Apesar di ta biba na Merca nunca el a lubida su isla natal y na cada oportunidad cu e logra e tabata duna Aruba un bishita, kedando principalmente cerca su ruman **Elva Bailly** na **Bubali Lodge**.

Ta mas o menos un aña pasa cu awacero pisa a cay na Aruba y cu e tabata di bishita y cu Bubali Lodge tambe a sufri di inundacion, unda el a topa cu **Prome Ministro Mike Eman** y **Ministro Sr. Benny Sevinger** y tabata den publicidad cu fotonan di e bishita di e mandatarionan na lugaman unda a wordo afecta pa awacero.

Na **New York** **Alfonso Gibbs**, como saxophonista tabata masha popular y tin varios CD riba su nomber.

E dos ultimo nan tabata **"In sync with Nature"** cu instrumentalnan cu cancion Amanda dedica na su yiu muher, fusion caribense cu ta **"Caribbean Fusion"**, **"Aruba's Sunset"** y **"Tropical Depression"** entre otro.

Su ultimo Cd tabata **"Reaching out"** di cual dos cancion a haci



impacto grandi. Un tabata **"Inolvidablemente"** di Julio Gutierrez y e otro ta **"Summertime"** di George Gershwin.

Ben, na Merca, **Fonso of Fong** na Aruba, tabata masha popular cerca esnan cu conoce y na New York den comunidad Arubano.

Por a nota esaki tambe mirando con for di ayera mainta e-mailnan tabata wordo manda di un pa otro cu informe di morto di Fong tanto na Aruba como den exterior y Merca.

El a laga atras un yiu muher y dos yiu homber di cualnan un a tuma tambe paso di su tata como educador.

Na **Sra. Elva Bailly** y demas famia, hopi forza y cu Fong sosega na paz.

Juby Naar.

Telefonan di DIARIO

582-6747

Fax: 582-8551